

DOMENIE XIX «VIE PAL AN»

Antifone di jentrade cf. Sal 73,20.19.22.23

Ten fede, Signôr, a la tô aleance,
no sta dismenteâti par simpri de vite dai tiei biâts.
Jeve sù, Signôr, e pare la tô cause,
no sta dismenteâ lis suplichis di chei che ti clamin.

Colete

Diu onipotent e eterni,
che si permetìn di clamâti cul non di Pari,
colme tai nestrìs cûrs il spirt di fîs d'anime,
par che o podìn jentrâ a gjoldi l'heritât imprometude.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE 1 Re 19,4-8

Ristorât cun chê mangjative, al cjaminà fintremai su la mont di Diu.

Dal prin libri dai Rês

In chê volte, Elie al tacà il desert par une zornade interie e al lè a sentâsi sot di un zenevrâr. Si augurà la muart e al disè: «Cumò mo ind ài vonde, Signôr! Cjolti la mê vite, che jo no soi miôr dai miei vons». Si distirà e si indurmidì. Ma ve che un agnul lu scjassà e i disè: «Jeve sù e mangje». Al cjalà ator e al viodè dongje dal so cjâf une pete cuete su lis pieris sbroventis e un crep di aghe. Al mangjà, al bevè e al tornà a pognisi. Ma l'agnul al tornà un'altre volte, lu scjassà e i disè: «Jeve sù e mangje, che tu âs masse strade di fâ». Al jevà, al mangjà e al bevè; po, ristorât cun chê mangjative, al cjaminà par cuarante dîs e cuarante gnots fintremai su la mont di Diu, l'Oreb. Peraule di Diu.

SALM RESPONSORIÂL dal Salm 33

R. Il to pan, Signôr, al sostente intal lôr viaç i puars.

O vuez benedî il Signôr cence polse,
la sô laut simpri su la mê bocje.
La mê vite tal Signôr si glorie,
che lu sepin i puars e si indalegrin. **R.**

Laudait cun me il Signôr,
puartìn il so non ducj insiemi.
O ài clamât il Signôr e lui mi à dade rispueste,
mi à deliberât di ogni fastidi. **R.**

Cjalaitlu lui e us lusaran i vôi,
lis vuestris musis no varan di diventâ rossis.
Chest biât al à berlât e il Signôr lu à scoltât,
e lu à deliberât di dutis lis sôs penis. **R.**

L'agnul dal Signôr al fâs une trincee
ator di chei che lu rispjetin e ju libere.
Cerçait e o viodarês cetant bon che al è il Signôr:
furtunât l'om che li di lui si pare. **R.**

SECONDE LETURE Ef 4,30-5,2

Compartaitsi cun amôr sul esempli di Crist.

De letare di san Pauli apuestul ai Efesins

Fradis, no stait a dâi displasês al Spirtu Sant di Diu, che us à segnâts pe zornade de redenzie.

Dislidrisait, fra di vualtris, ogni sorte di durece, rancôr, rabie, berli, cjàcare e tristerie. Viodêt invezit di jessi bogns un cul altri, plens di boncûr, perdonantsi un cul altri, come che ancje Diu us à perdonât in Crist.

Cirît di fâ compagn di Diu, come fîs benvolûts, e compuartaitsi cun amôr sul esempli di Crist che us à volût ben e si è ufiert par nô, ufierte e sacrifici a Diu plen di bon odôr.

Peraule di Diu.

CJANT AL VANZELI Zn 6,51

R. Aleluia, aleluia.

O soi jo il pan vîf vignût jù dal cîl, al dîs il Signôr,
se un al mangje di chest pan, al vivarà par simpri.

R. Aleluia.

VANZELI Zn 6,41-51

O soi jo il pan vîf vignût jù dal cîl.

Dal vanzeli seont Zuan

In chê volte, i Judeus a bruntulavin cuintri di Jesù parcè che al veve dit: «O soi jo il pan vignût jù dal cîl», e a disevin: «Chel chi no isal Jesù, fi di Josef, e nô o cognossìn so pari e sô mari? Cemût puedial dî cumò: O soi vignût jù dal cîl?». Jesù ur rispuindè: «No stait a bruntulâ fra di vualtris.

Nissun nol pò vignî di me se il Pari che mi à mandât no lu tire dongje, e jo lu risussitarai te ultime

dî. Tai profetis al è scrit: “E a saran ducj istruûts di Diu”. Ducj chei che a àn scoltât il Pari e a àn

acetât il so insegnament, a vegnin di me. No che cualchidun al vedi viodût il Pari, fûr di chel che al è di Diu; dome lui al à viodût il Pari. In veretât, in veretât us dîs: Chel che al crôt al à la vite eterne.

O soi jo il pan de vite. I vuestris vons a àn mangjade la mane tal desert e a son muarts. Chest chi al è il pan che al ven jù dal cîl, par che si lu mangji e no si mueri. O soi jo il pan vîf vignût jù dal cîl. Se un al mangje di chest pan, al vivarà par simpri. E il pan che i darai jo e je la mê cjar par che il mont al vivi».

Peraule dal Signôr.

Su lis ufiertis

Acete di bon voli, Signôr, i regâi de tô Glesie,
che tal to boncûr tu jai âs consegnâts par che tai ufrissi,
e cu la tô fuarce fasiju diventâ il misteri che nus salve.

Par Crist nestri Signôr.

Antifone a la comunion Sal 147,12.14

Jerusalem, dai glorie al Signôr,

cu la flôr dal forment lui ti sostente.

O ben: cf. Zn 6,51

Il pan che o darai jo

e je la mê cjar, par che il mont al vivi, al dîs il Signôr.

Daspò de comunion

La comunion cui tiei misteris

che nus salvi, Signôr,

e nus confermi te lûs de tô veretât.

Par Crist nestri Signôr.

